

Dörfligeischer 1990

Umwält schütze – Bus benütze,
Wie wett dä Spruch ou öppis nütze ?
Jetz zahlst für e Trolley – gopfridstutz ! –
E Franke Zwänzg statt numme-n-e Stutz !
Drum gäh mir allne jetz e Rat :
Fahret mit de Rollschueh dür d' Stadt !

Am Mäntig hett är d' Zahn nid putzt,
Am Zischtig hett är d' Grawatte verschmutzt,
Am Mittwoch hett är sich verschloofe,
Am Donnschtig hett är e Stange gsoffe,
Am Fritig hett är Blaue gmacht,
Am Samschtig hett är am Hockey-Match glacht,
Die Brichte vom Fehr hei mir überno,
Wie si im Bundes-Archiv tüe sto !

Syt's ds Bieler Tagblatt farbig git,
Isch der Blick im Seeland nümm' der Hit,
Nur öppis macht ne überläge,
Mir dörfe's hie fasch gar nid säge:
Wenn gseht das mou der Gassma y,
Und druckt es Görl uf Site drüü ?

Luegsch am FC Biel bym Schutte zue,
De weisch nid, spiele si blindi Chue,
Die einte tüe nume umestoh,
Die angere seckle vor Angscht dervo,
Und we ne de e Balle gisch,
De frooge si, für was die isch !

Es Huehn, e Güggu und e Henne,
Hei vo letscht, no churz spitz vorem penne,
Zum ne Schlummertrünkli wöue glange,
Und sy du plötzlech im Volkshuus gstange,
Im grosse Saal isch der Stadtrat gsässe
Und hett d' Räschte vom Elite gfrässe !

Im Summer, do git's ds Biel e Platz,
Do tummlet sech alles, Hung u Chatz,
Und näbscht der ganze Viecherei,
Herrscht dört e grossi Souerei,
Jä jo ihr Lüt, so isch das halt,
Syt me im Strampi kei Ytritt meh zahlt !

D' Schueh die gö nach Pole,
D' Socke zu de Mongole,
D' Helme choufe d' Pakistaner,
U d' Funkgrät gö a d' Mexikaner,
Um d' Sturmgwehr strittet d' Mafia,
U d' Panzer göh nach Panama,
D' Flüüger gö nach Malta,
Der Räschte nach Obervolta,
So wär das öppe usecho,
We mer d' Armee hätt abschaffe lo !

Vor churzem hei mir grad erfahre,
Dass d' Stadt bi de Putzfroue wöui spare,
Doch statt i de Schuele, ohni z' lache
Sött me's i der Regierig mache,
De müesste d' Gmeinrät, wo d' Schyssi benutze,

Se nächhär ou grad sälber putze !

Ds Lisi Kopp hett müesse vor Gricht,
Wie ungrächt die Wält isch, zeigt üs die Gschicht,
Wenn es Bier nid zahlsch, de chöme d' Jurische,
Und gheie di vierzäh Tag i d Chischte,
Hesch johrelang glooge, chunnsch zum Grichtssaal us
Lächelnd mit em ne Bluemestruuss !

Oli, Normand und Gaston,
Laurent, Marc und Gaetan,
Dass sy d' Stare vom EHCB,
So guet hesch die scho lang nümme' gseh,
Doch leider leider, gloubet üs Geischer,
Wärde si hüür nid Schwyzer Meischer !